

REGIONE AUTÒNOMA DE SARDIGNA

PRESIDÈNTZIA

Su Presidente

Prot. n. 1845

ORDINÀNTZIA N. 1 DE SU 22 FREÀRGIU 2020

Chistione: Ordinàntzia contingibile e urgente pro s'atuatzione de sas dispositziones de su Ministeru de sa Salute emanadas in die 21 freàrgiu 2020 contra sa difusione de sa maladia infetiva COVID-19.

SU PRESIDENTE

BIDU s'Istatutu Ispetziale pro sa Sardigna e sas normas de atuatzione chi li pertocant;

BIDA sa lege regionale 7 de Ghennàrgiu 1977, chi tratat "Normas subra de s'organizatzione amministrativa de sa Regione Sarda e subra de sas competèntzias de sa Giunta, de sa Presidèntzia e de sos Assessorados regionales"

BIDU su decretu legislativu n. 1 de su 2 ghennàrgiu 2018 Còdighe de sa protetzione tzivile;

BIDA sa delibera de su Consìgiu de sos Ministros de su 31 ghennàrgiu 2020 Decraratzione de s'istadu de emergèntzia in consequèntzia de s'arriscu sanitàriu ligadu a maladias pro agentes virales trasmissìbiles;

BIDA s'ordinàntzia de su Cabu de su Dipartimentu de protetzione tzivile n. 630 de su 3 freàrgiu 2020 chi tratat "Primos interventos urgentes de protetzione tzivile pro su chi pertocat s'emergèntzia de s'arriscu sanitàriu ligadu a maladias pro agentes virales trasmissìbiles;

BIDA s'ordinàntzia de su Ministru de sa Salute de su 21 freàrgiu 2020 chi ponet àteras measuras profilàticas contra sa difusione de sa maladia infetiva COVID-19;

BIDA la Lege 23 de su mese de Nadale 1978, n. 833 "Istituzione de su servìtziu sanitàriu natzionale e mescamente s'art 32;

RITÈNNIDU de dèpere adotare measuras organizativas e atuativas de s'ordinàntzia ministeriale mentovada subra, pro dare indicos operativos a sas aziendas sanitàrias;

ISCUMPROADU chi adotare custu provedimentu est urgente e non si podet diferire;

ÒRDINAT

Art. 1) S'azienda sanitària competente pro su territòriu disponet sa misura de sa cuarentena cun survegliàntzia ativa, pro batòrdighi dies, pro sas persones chi ant àpidu cuntatos istrintos cun persones cunfirmadas positivas a sa maladia infetiva difusiva COVID-19.

Art. 2) S'azienda sanitària competente pro su territòriu adotat sa misura de sa permanèntzia domitziliare fidutzìaria cun survegliàntzia ativa pro sos chi, in sas ùrtimas 14 dies, siant torrados in Itàlia dae sos territòrios de sa Tzina in ue b'est s'epidemia. Si bi diant èssere cunditzones chi non permitent sa permanèntzia domitziliare, s'azienda sanitària, paris cun sas autoridades competentes e cun sos assòtzios de voluntariadu, depet agatare àteras mesuras cun sa matessi eficàtzia.

Art. 3) Pro minimare sos cuntatos cun àteras persones, s'operadore sanitàriu chi at leadu in càrrigu su tzitadinu in survegliàntzia ativa, dat totu sas dispositziones de igiene personale.

Art.4) Pro sas persones mentovadas dae s'art 2, su personale sanitàriu de s'azienda sanitària competente in su territòriu faghet cada die una rilevatzione de sas cunditzones clínicas. Si si diant manifestare s'ìntomos lèbios comente: rinorrea, tussu, dificultade respiratòrias e frebba, tocat chi sa persone fatzat in domo sua su tampone oro-faringeu. Si custu diat èssere positivu, si adotat su protocollu vigente pro sa gestione de sas persones in arriscu de malattia infetiva COVID-19 chi est adotadu dae totu sas aziende sanitàrias.

Art.5) Essende bàlidas sas mesuras de preventzione giai leadas pro evitare de andare pro diagnosi a su prontu sucursu, si calicunu bi diat andare, su chi depet rilevare sos datos anagràficos rechedet a s'utente chi decretet, si in sas ùrtimas 14 dies coladas, at àpidu cuntatos istrintos cun persones chi est cunfirmadu chi tenent sa malattia infetiva COVID-19, o chi sunt torradas in Itàlia dae sos territòrios de sa Tzina in ue b'est s'epidemia o sunt istadas in sos territòrios de àteros istados o in sas regiones italianas in ue b'at persones positivas a sa malattia.

Art.6) Si sa persone diat rispòndere chi emmo tocat de ativare su protocollu vigente pro sa gestione de sas persones in arriscu de malattia infetiva COVID19 adotadu dae totu sas aziende sanitàrias.

Est cunfirmadu su divietu de atzedere a sas istruturas sanitàrias pro sas persones mentovadas dae s'art. 1 e art. 2 e de impreare sos nùmeros de sa sùrvegliàntzia ativa (118 Igiene pùblica competente in su territòriu) pro cada comunicatzione, informatzione e netzessidade. Pro sos chi sunt sutapostos a su regime de sa survegliàntzia ativa, s'azienda sanitària lassat, a poi de rechesta, su tzertificadu chi atestat s'istadu de malattia.

Art. 7) Custa ordinàntzia tenet balididade de 90 dies dae oe, est imbiada deretu a su Presidente de su Consìgiu de sos Ministros, a su Ministru de sa Salute, a su Cabu de su Dipartimentu de sa protettione tzivile, a sos Prefetos de sos Ufìtzios territoriales de governu de sa Sardigna, a sos Assessoros regionales, a sos Amministradores de sas provìntzias de su territòriu regionale, a su Sìndigu de sa Tzitade Metropolitana de Casteddu e a sos Sìndigos de sos Comunes de sa Sardigna.

Art. 8) Est delegada a sas istruturas competentes de sa pùblica Amministratzione s'atuatzione e sa vigilàntzia pro su chi pertocat su respetu de custa ordinàntzia.

Art. 9) Custa ordinàntzia est publicata in su BURAS e in su giassu internet istituzionale de sa Regione Sardigna.

Su Presidente
firmadu Christian Solinas